

第五四七册

博物彙編

草木典

竹部

松部

柏部

梅部

(卷)

一五一一

一五一一

一五一一

一五一一

古今圖書集成

中華書局影印

古今圖書集成

中華書局影印



欽定古今圖書集成博物彙編草木典
第一百九十五卷目錄
竹部紀事一



草木典第一百九十五卷

竹部紀事一

漢書律歷志黃帝使伶倫自大夏之西崐嶠之陰取竹之解谷生其竅厚均者斷兩節間而吹之以爲黃鐘之宮制十二筩以聽鳳之鳴其雄鳴爲六雌鳴亦六比黃鐘之宮而皆可以生之是爲律本注孟康曰解脫也谷竹溝也取竹之脫無溝節者也一說崑崙之北谷名也應劭曰生者治也竅孔也孟康曰竹孔與肉薄厚等也晉灼曰取谷中之竹生而孔外肉厚薄自然均者截以爲筩不復加削刮也

韓詩外傳黃帝時鳳凰棲帝梧桐食帝竹實

博物志堯之二女舜之二妃曰湘夫人舜崩二妃啼

以涕揮竹竹盡斑

述異記湘水去岸三十里許有相思宮望帝臺昔舜

南巡而葬於蒼梧之野堯之二女娥皇女英追之不

及相與協哭淚下沾竹竹文上爲之斑斑然

汲冢周書王會解路人大竹注路人東方蠻也貢大

竹

述異記東海畔有孤竹焉斬而復生中爲管周武王時孤竹之國獻瑞筍一株
竹書紀年天子西征至於元池天子三日休於元池之上乃奏廣樂三日而終是曰樂池天子乃樹之竹是曰竹林

晏子景公樹竹令吏謹守之公出過之有斬竹者焉公以車逐得而拘之將加罪焉晏子入見曰公亦聞吾先君丁公乎公曰何如晏子曰丁公伐曲沃勝之止其財出其民公曰自茲之有與死人以出者公怪之令吏視之則其中金與玉焉吏請殺其人收其金玉公曰以兵降城以衆圍財不仁且吾聞之人君者寬惠慈衆不身傳誅令捨之公曰善晏子退公令出斬竹之囚

墨子公輸子削竹木以爲鵲鵲成而飛之三日不下自以爲巧

吳越春秋越王問范蠡用兵對曰越有處女願君王問之處女北行見王道逢老人自稱袁公即杖篠簪竹末折墮地處女即接其末公操其本而刺處女處女舉杖擊之公飛上樹變爲白猿

史記趙世家知伯率韓魏攻趙趙襄子懼乃奔保晉陽原過從後至於王澤見三人自帶以上可見自帶

以下不可見與原過竹二節莫逼曰爲我以是遺趙毋卹原過既至以告襄子襄子齋三日親自剖竹有朱書曰趙毋卹余霍泰山陽侯天使也三月丙戌余將使女反滅知氏女亦立我百邑余將賜女林胡之地至於後世襄子再拜受三神之令使相張孟同私於韓魏韓魏與合謀以三月丙戌三國反滅知氏

共分其地於是遂祠三神於百邑使原過主霍泰山祠祀

拾遺記始皇起雲臺窮四方之珍木得雲岡素竹漢書高祖本紀高祖爲亭長乃以竹皮爲冠令求盜之薛治時時冠之及貴常冠所謂劉氏冠也按注應劭曰以竹始生皮作冠今鵲尾冠是也求盜者亭卒薛魯國縣也有作冠師故往治之韋昭曰竹皮竹筠也今南夷取竹幼時續以爲帳師古曰竹皮竹筠謂筍上所解之籜耳非竹筠也今人亦往往爲筍皮中古之遺制也韋說失之

地道志梁孝王東苑方三百里卽兔園也多植竹中有修竹園

四川志邛州南八里有邛崃山漢張騫奉使西域得高節竹植於邛山

史記西南夷傳元符元年博望侯張騫使大夏來言居大夏時見蜀布邛竹杖使問所從來曰從東南身毒國可數千里得蜀賈人市按注犢曰邛山名此竹節高實中可作杖

河渠書天子使汲仁郭昌發卒數萬人塞瓠子決是時東流郡燒草以故薪柴少而下淇園之竹以爲樵四川志漢實誼居蜀之峨眉放浪不羈月夜子規啼竹上誼曰竹裂吾可歸峩峩峩峩夕竹裂黎明遁於峩峩

峩峩武帝三徵不起
三輔舊事武帝作延陵及廟寶將軍有青竹園在廟南恐犯蹈之言作陵不便

東觀漢記馬援至荔浦見冬筍各苞上言禹貢厥苞橘柚疑謂是也

橘柚疑謂是也

後漢書寇恂傳光武定河內拜恂河內太守行大將軍事恂移書屬縣講兵肄射伐淇園之竹爲矢百餘萬養馬二千匹收租肆百萬斛轉以給軍

漢書西南夷傳夜郎者初有女子浣於逐水有三節大竹流入足間聞其中有號聲剖竹視之得一男兒歸而養之及長有才武自立爲夜郎侯以竹爲姓武帝元鼎六年平南夷爲牂牁郡夜郎侯迎降天子賜其王印綬後遂殺之夷獠咸以竹王非血氣所生甚重之求爲立後牂牁太守吳霸以聞天子乃封其三子爲侯死配食其父今夜郎縣有竹王三郎神是也述異記漢章帝三年子母竹筍生白虎殿前謂之孝竹羣臣作孝竹頌

後漢書費長房傳費長房者汝南人也曾爲市掾市中有一老翁賣藥懸一壺於肆頭及市罷輒跳入壺中市人莫之見唯長房於樓上觀之異焉因往再拜奉酒脯翁知長房之意其神也謂之曰子明日可更來長房且日復詣翁翁乃與俱入壺中唯見玉堂嚴麗旨酒甘肴盈衍其中共飲畢而出翁約不聽與人言之後乃就樓上候長房曰我神仙之人以過見責今事畢當去子寧能相隨乎樓下有少酒與卿爲別長房使人取之不能勝又令十人扛之猶不舉翁聞笑而下樓以一指提之而上視器如一升許而二人飲之終日不盡長房遂欲求道而顧家人爲憂翁乃斷一青竹度與長房身齊使懸之舍後家人見之即長房形也以爲縊死大小驚號遂殯葬之長房立其傍而莫之見也於是遂隨從入深山踐荆棘於群虎之中留使獨處長房不恐又臥於空室以朽索懸萬斤

石於心上衆蛇競來齧索且斷長房亦不移翁還撫之曰子可教也復使食糞糞中有三蟲臭穢特甚長房意惡之翁曰子幾得道恨於此不成如何長房辭歸翁與一竹杖曰騎此任所之則自至矣既至可以杖投葛陂中也又爲作一符曰以此主地上鬼神長房乘杖須臾來歸自謂去家適經旬日而已十餘年矣即以杖投陂顧視則龍也家人謂其久死不信之長房曰往日所葬但竹杖耳乃發冢剖棺杖猶存焉五色線馬均大巧能削竹作人語時天下大旱人皆將酒與此竹人語天須臾雨也

廣志魏漢中太守王圖每冬獻筍俗謂之箴苛楚國先賢傳孟宗字恭武至孝母好食筍宗入林中哀號方冬爲之出因以供養時人皆以爲孝感所致晉書杜預傳預伐吳進逼江陵吳之州郡皆望風歸命時衆軍議侯來冬更爲大舉預曰昔樂毅藉濟西一戰以并疆齊今兵威已振譬如破竹數節之後皆迎刃而解無復著手處也遂指授羣帥徑進秣陵五行志惠帝元康二年春巴西郡界竹生花紫色結實如麥外皮青中赤白味甘

漢書地理志秦地有鄂杜竹林南山檀栢號稱陸海爲九州膏腴孝經河圖少室之山有鑿器竹堪爲釜甑三輔黃圖竹宮甘泉祠官也以竹爲宮天子居中三輔舊事實將軍有青竹田三輔決錄將詔舍種竹下開三徑有羊仲裘仲之徒與之游搜神記蔡邕嘗至柯亭以竹爲椽邕仰盼之曰良竹也取以爲笛發聲聲遠亮一云邕告吳人曰吾昔嘗經會稽高遷亭見屋東開第十竹椽可爲笛取用果有異聲笑林漢人有適吳吳人設筍問是何物語曰竹也歸糞其牀實而不熟乃謂其妻曰吳人輕讒欺我如此世說新語魏武征袁本初治裝餘有數十斛竹片咸長數寸衆云並不堪用正令燒除太祖思所以用之謂可爲竹梓楯而未顯其言馳使問主簿楊德祖應聲答之與帝心同衆服其辯悟

嵇康傳康少孤有奇才遠邁不羣身長七尺八寸美詞氣有風儀而土木形骸不自藻飾人以爲龍章鳳姿天質自然所與神交者惟陳留阮籍河內山濤豫其流者河內向秀沛國劉伶籍兄子咸瑯琊王戎遂爲竹林之游世所謂竹林七賢也成都古今記山濤治郫時刺大竹釀醪作酒兼旬方開香聞百步外故蜀人傳其法彙苑詳注阮籍遊蘇門山見一隱者莫知姓名惟有竹實數斛杵臼而已晉書紀瞻傳瞻性沈默少交遊好讀書厚自奉養立宅於烏衣巷館宇崇麗園池竹木有足賞翫焉陶侃傳侃領交州刺史王敦平遷都督荆雍益梁州諸軍事領護南蠻校尉征西大將軍荊州刺史時造船木屑及竹頭悉令舉掌之咸不解所以後正倉積雪始晴廳事前餘雪猶濕於是以屑布地及桓溫伐蜀又以侃所貯竹頭作丁裝船其綜理微密皆此類也世說新語陶公性檢厲勤於事嘗發所在竹篙有一

官長連根取之仍當足乃趨兩階用之

永嘉郡記樂成張唐者隱居顧志家有苦竹數十頃在竹中爲屋常居其中王右軍聞而造之焉逃避竹中不與相見一郡號爲竹中高士

高士春秋王微之以菖蒲映竹曰菖蒲止以九節爲貴而此君面目聳然正當再拜此君而此君亦安得不受之耶

晉書王微之傳微之性卓犖不羈時吳中一士大夫家有好竹欲觀之使出坐輿造竹下諷嘯良久主人灑掃請坐微之不顧將出主人乃閉門微之便以此賞之盡歡而去嘗寄居空宅中便令種竹或問其故嘯味指竹曰何可一日無此君耶

符堅載記堅聞慕容冲去長安二百餘里引師而歸以尚書姜宇爲前將軍與苻琳率衆三萬擊冲於灊上爲冲所敗宇死之琳中流矢冲遂據阿房城初堅之滅燕冲姊爲清河公主年十四有殊色堅納之寵冠後庭冲年十二亦有龍陽之姿堅又幸之姊弟專寵宮人莫進長安歌之曰一雌復一雄雙飛入紫宮咸懼爲亂王猛切諫堅乃出冲長安又謠曰鳳凰鳳凰止阿房堅以鳳凰非梧桐不棲非竹實不食乃植桐竹數十萬株於阿房城以待之冲小字鳳凰至是終爲堅賊入止阿房城焉

異苑晉太元中汝南人入山伐竹見一竹中蛇形已成上枝葉如故又吳郡桐廬人常伐餘遺竹見一竹竿雉頭頸盡就身猶未變此亦竹爲蛇蛇爲雉也西州後賢志何隨有家養竹園人盜其筍隨遇行見之恐盜者覺怖走竹中傷其手足屢徐步而歸其

仁如此

晉書五行志安帝元興三年荆江二州界竹生實如麥

風土記陽羨縣有袁君家壇邊有數林大竹並高二丈枝皆披掃壇上常潔淨也

拾遺記蓬萊有浮筠之簞葉青莖紫子大如珠有青鸞集其上下有沙磔細如粉柔風至葉條翻起拂細沙如雲霧仙者來觀而戲焉風吹竹葉聲如鐘磬之音

湘中記文斤山上有石牀方高一丈四面綠竹扶疎常隨風委拂此牀

博物志止些山多竹長千仞鳳食其實去九疑萬八千里

廣州記石麻之竹勁而利削以爲刀切象皮如切芋山有鳳鸞棲宿食其實山東有溪曰羅陽未泰中暑雨漲有一竹葉若芭蕉葉隨水出

晉翟莊子祖休湯之子以孝友著名守父操州致禮命並不就莊子矯亦高節家居無事好種竹辟命屢至嘆曰吾焉能易吾種竹之心以從事於籠鳥盆魚之間哉竟不就矯子法賜節概尤佳武帝以散騎郎召客勉之就聘乃正色曰吾家不仕四世矣使白璧點污可乎亦不從之祖父子孫皆有行義世稱潯陽四隱

荊州記臨賀謝休縣東山中有大竹數十圍高亦數十丈有小竹生其旁皆四五圍下有盤石徑四五丈極方正青如彈碁局兩竹屈垂拂掃石上初無塵穢未至數十里聞風吹此竹如簫管之音

天門山角上各生一竹倒垂拂拭謂之天帚

永嘉郡記陽嶼有仙石山頂上有平石方十餘丈名仙壇壇輒輒有一筍竹凡有四竹歲葳蕤青翠風來動音自成宮商石上淨潔初無粗籜相傳云曾有却粒者於此羽化故謂之仙石

小江緣岸有仙石壇有竹嫋媚青翠風來枝動掃石壇壇上無塵也

東陽記崑山去蕪城山十里山峯嶺高峻常秀雲表故老傳云嶺上有員池魚鼈具有池邊有竹極大風至垂屈掃地恆潔淨如人掃也

南越志博羅縣東蒼州足簞竹銘曰簞竹既大薄且空中節長一丈其長如松

羅浮山記嶺南道無筍竹惟此山有之其大尺圍細者色如黃金堅貞疎節

廬山記山中有竹莖如指竹杪細葉密翠如箒採以贈人謂之掃雲帚

丹陽記江寧縣南三十里有慈母山積石臨江上生簞管竹自俗倫採竹嶸谷其後惟此筍見珍故歷代常給樂府而俗呼曰鼓吹山今慈湖成常禁采之王褒洞簫賦所稱即此也其竹圓緻異於餘處

異苑建安有貧簞竹節中有人長尺許頭足皆具元嘉四年東陽雷道先家中筍竹林忽生連理野人無知謂之福崇欲斫殺之

宋書郭世道傳世道子原平稟至行居宅下濕遠宅爲溝以通於水宅上種少竹春月夜有盜其筍者原平偶起見之盜者奔走堅溝原平自以不能廣施至使此人顛沛乃於所植竹處溝上立小橋令足通行

此為試讀，需要完整PDF請訪問：www.ertongbook.com

又采荀置籬外鄰曲慙愧無復取者

沈道虔傳道虔吳興武康人也居縣北石山下人拔其屋後荀令人止之曰惜此荀欲令成林更有佳者相與乃令人買大荀送與之盜者慙不取道虔使置其門內而還

南史袁粲傳粲字景倩明帝五年加中書令又領丹

陽尹粲負才尚氣愛好虛遠雖位任隆重不以事務經懷獨步園林詩酒自適家居負郭每杖策逍遙當其意得悠然忘反郡南一家頗有竹石粲率爾步往亦不通主人直造竹所嘯咏自得主人出語笑款然俄而車騎羽儀至門方知是袁尹

明僧紹傳僧紹隱長廣郡嶗山聚徒立學昇明中弟慶符爲青州僧紹乏糧食隨慶符之鬱洲往舍榆山栖雲精舍齊建元元年冬徵爲正員郎稱疾不就高帝後謂慶符曰卿兄高尚其事亦堯之外臣朕夢想幽人固已勤矣所謂逕路絕風雲通仍賜竹根如意荀簪冠隱者以爲榮焉

武陵昭王傳豫章王於邸起土山列種桐竹號爲桐山

徐伯珍傳伯珍字文楚東陽太末人也祖父竝郡掾史伯珍少孤貧學書無紙常以竹箭箸葉甘蔗及地上學書山水暴出漂溺宅舍村鄰皆奔走伯珍累牀而坐誦書不輟

南海王子罕傳子罕母樂容華嘗寢疾子罕晝夜祈禱於時以竹爲燈續照夜此續宿昔枝葉大茂母病亦愈咸以爲孝感所致主簿劉融及侍讀賀子喬爲之賦頌當時以爲美談

南齊書劉懷珍傳懷珍字靈哲建元初歷寧朔將軍臨川王前軍諮議廬陵內史齊郡太守前軍將軍靈哲所生母嘗病靈哲躬自祈禱夢見黃衣老公曰可取南山竹笋食之疾可立愈靈哲驚覺如言而疾瘳南史宗測傳測少靜退不樂人間王儉雅重之贈以蒲褥荀席

常新錄宗測樂閒靜好松竹嘗見日篩竹影上憲以筆備描之

梁書范元琰傳元琰家貧惟以園蔬爲業或有涉溝盜其荀者元琰因伐木爲橋以渡之自是盜者大慙一鄉無復草竊

阮孝緒傳孝緒性沈靜所居室唯有一鹿牀竹樹環繞

南史沈約傳約子旋旋子衆衆字仲師好學頗有文詞仕梁爲太子舍人時梁武帝制千文詩衆爲之注解與陳郡謝景同時召見於文德殿帝令衆爲竹賦賦成奏之手勅答曰卿文體翩翩可謂無忝爾祖

述異記岑華山在西海之西有夢竹爲簫管吹之若群鳳之鳴

衛有淇園出竹在淇水之上

天台山志甘竹實出天台山開闢真人以致元帝

南雍州記辛居士名宣仲家貧春月鬻荀充餽酌截竹爲器用充盛置人問其故宣仲曰我惟愛竹好酒欲令二物常相並耳

魏書彭城王勰傳高祖與侍臣升金墉城顧見堂後梧桐竹曰鳳凰非梧桐不棲非竹實不食今梧桐竹並茂詎能降鳳乎勰對曰鳳凰應德而來豈竹梧桐

能降高祖曰何以言之勰曰昔在虞舜鳳凰來儀周之興也鸞鸞鳴於岐山未聞降桐食竹高祖笑曰朕亦未望降之也

水經注長泉水逕七賢祠東左右筠篁列植冬夏不變貞萎

洛陽伽藍記永寧寺僧房樓觀一千餘間翠竹香草布漫階墀

景明寺房簷之外皆是山池松竹蘭芷垂列階墀含風團露流香吐馥

北齊書楊愔傳愔字遵彥一門四世同居家甚隆盛昆季就學者三十餘人學庭前有柰樹實落地群兒咸爭之愔頽然獨坐其季父暉適入學館見之大用嗟異顧謂賓客曰此兒恬裕有我家風宅內有茂竹遂爲愔於林邊別葺一室命獨處其中常以銅盤具盛饌以飯之因以督厲諸子曰汝輩但如遵彥謹慎自得竹林別室銅盤重肉之食

隋書明克讓傳克讓字弘道平原高平人也父山賓梁侍中克讓少好儒雅善談論博涉書史所覽將萬卷三禮禮記尤所研精龜策歷象咸得其妙年十四釋褐湘東王法曹參軍時舍人朱昇在儀賢堂講老子克讓預焉堂邊有修竹昇令克讓誅之克讓攬筆輒成其卒章曰非君多愛賞誰貴此貞心昇甚奇之

南部煙花錄臨池觀竹既枯后每思其響夜不能寢帝爲作薄玉龍數十枚以縷線懸於簷外夜中因風雨相擊聽之與竹無異

花木考新羅神文王時東海中有小山浮水隨波往來王異之泛海入其山上有竿竹命作笛吹之兵

退病愈旱雨晴風定波平號萬波息笛

羣居解頤唐初有裴略者宿衛考滿兵部試判爲錯一事落第此人卽向溫彥博處被訴彥博時與杜如晦坐不理其訴此人卽云少小以來自許明辨至於通傳言語堪作通事舍人并解文章兼能嘲戲彥博始同意共語時廳前有竹彥博卽令嘲竹此人應聲嘲曰竹風吹青肅肅凌寒葉不凋經冬子不熟虛心未能待國士皮上何勞生節目彥博卽云爾解通傳言語可傳語廳前屏牆此人走至廳前大聲語曰方今聖上聰明關四門以待士君是何人物在此妨賢路卽推倒彥博曰此人著膊此人云非但著膊亦當著肚彥博如晦大嘆喜卽令送吏部與官

唐書百官志司竹監一人從六品下副監一人正七品下丞二人正八品上掌植竹葦供宮中百司簾簾之屬歲以筍供尚食

五行志景龍四年京畿藍田山竹實如麥占曰大饑蘇世長傳世長子良嗣爲荊州長史帝遣宦者采怪竹江南將蒔上苑宦者所過縱暴至荆良嗣囚之上書言狀帝下詔慰獎取竹蕞之

五行志開元二年終南山竹有華實如麥嶺南亦然竹並枯死是歲大饑民採食之占曰國中竹柏枯不出三年有喪

十七年睦州竹實

王維傳維別墅在輞川地奇勝有華子岡欽湖竹里館柳浪茱萸泚辛夷塢與裴迪游其中賦詩相酬爲樂

李白傳白與孔巢父韓準裴政張叔明陶沔居徂來

山日沈飲號竹溪六逸

元山記孟浩然一日周旋竹間喜色可掬又見網師得魚尤甚喜躍友人問之答云吾適得句中有魚竹二物不知竹有幾節魚有幾鱗疑致疏謬今見二物乃釋然矣

續世說杜子美居蜀於浣花里種竹植木結廬枕江縱酒吟咏與田畯野老相狎

叩頭錄皮藩去北而復來鄱陽食竹筍曰三年不見羊角哀矣

雲仙雜記裴晉公於藍田得一大筍破之有三四眼晴甚香美

韓愈藍田縣丞廳壁記庭有老槐四行南牆鉅竹千挺儼立若相持

桂苑叢談太尉朱崖公兩出鎮於浙右前任罷日遊甘露寺因訪別於老僧院啜茗既終將欲辭去公曰

昔有客遺筍竹杖一條聊與師贈別亟令求之須臾而至其杖雖竹而方所持向上節眼鬚牙四面對出

天生可愛別後不數歲再領朱方復因到院問前時拄杖何在曰至今寶之公請出觀之則老僧規圓而

漆之矣嗟歎彌日自此不復目其僧矣

西陽雜俎衡公言北都唯童子寺有竹一窠纔長數尺相傳其寺綱維每日報竹平安

東宮郡東有蕪地西鄰大海有長洲多桃枝竹綠岸而生

張芬曾爲南康親隨行軍常揀向陽巨筍纖竹籠之隨長旋培常畱寸許度竹籠高四尺然後放長秋深方去籠伐之一尺十節其色如金

尚書故實崔魏公說有王修能變竹葉爲黃金

西溪叢話李義山崇讓宅謠詩風過迴塘萬竹悲洛陽有崇讓坊有河陽節度使王茂元宅李卽茂元之壻韋氏述征記云此坊出大竹及桃

荆溪疏金沙寺在湖汊東南一里唐陸希聲舊宅今尚有讀易臺遠寺竹竿可數萬箇

唐書五行志開成四年六月襄城山竹有實成米民採食之

党項傳宣宗大中四年內掠邠寧詔鳳翔李業河東李拭合節度兵討之宰相白敏中爲都統帝出近苑或以竹一箇植舍外見纔尺許遠且百步帝屬二矢

曰党羌窮寇仍歲暴吾郡今我約射竹中則彼當自亡不中我且索天下兵窮之終不以此賊遺子孫左

右注目帝一發竹分矢徹諸外左右呼萬歲不閱月羌果破殄餘種竄南山

南詔傳尋傳蠻者俗無絲織既履榛棘不苦也戰以竹籠頭如兜鍪

環王傳環王戰象藤爲鎧竹爲弓矢

唐國史補李舟好事嘗得村舍煙竹截以爲笛堅如鐵石遺李牟牟吹笛爲天下第一月夜泛江維舟吹

之寥亮逸發上徹雲表俄有客獨立於岸呼船請載既至請笛而吹甚爲精壯山河可裂牟平生未嘗見

及入破呼吸盤擗其笛應聲粉碎客散不知所之舟著記疑其蛟龍也

玉堂閒話唐天復甲子歲自隴而西迨於襄梁之境數千里內亢陽民多流散自冬經春饑民啖食草木

至有骨肉相食者甚多是年忽山中竹無巨細皆放

花結子饑民採之春米而食珍於粳糯其子粗顏色紅纖與今紅梗不殊其味尤更馨香數州之民皆挈累入山就食之至於溪山之內居人如市人力勝者就置園廩而貯之家有羨糧者又取與輩茹血肉而同食者嘔噦如中毒十死其九其竹自此千蹊萬谷並皆立枯十年之後復產此君可謂百萬圓顚活之於貞筠之下

李從儼有竹千畝在鳳翔懼侵民利未嘗省理北戶錄湘源縣十二月食斑皮竹筍諸筍無以及之傲戒錄蜀郡大慈寺律師修準雖云奉律性甚褊躁庭前植竹多蟻子緣欄檻準怒伐去竹盡取蟻子棄灰火中準後忽患癰瘡遍頭面醫者云蟻漏瘡不可醫竟卒

在窮記廣南以竹爲硯

圖繪寶鑑李夫人西蜀名家未詳世胄善屬文尤工書畫郭崇韜伐蜀得之夫人以崇韜武弁常鬱悒不樂月夕獨坐南軒竹影婆娑可喜即起揮毫濡墨橫寫憲紙上明日視之生意具足自是人間往往效之遂有墨竹

五代史庾載傳載少好學善屬文遊相國寺見庭竹可愛作碧鮮賦題其壁世宗聞之遣小黃門就壁錄之覽而稱善因拜水部員外郎知制誥遷翰林學士賜緋

清異錄荊南判官劉或棄官遊秦隴閩粵篋中藏大竹十餘類每有客至所取少許煎飲其辛香如難舌人叩其名曰謂之丁香竹非中國所產也

江湖間有一種野竹其葉糾結如蟲狀山民曰此蚌

蝨竹也

海南島中一類筍極腴厚而甚短島人號平頭筍余爲筍效傳休奕作墓誌曰邊幼節宇腕中晉林瑯琊之裔也以湯卒

廣政錄孟氏有蜀時翰林學士徐光溥劉侍郎義更分直忽覩庭中筍迸出徐因題之劉性多譏誚徐托土本是蜀人徐詩曰迸出斑犀數十株更添幽景向蓮壺出來似有凌雲勢用作丹梯得也無劉詩曰徐徐出土非人種枝葉難投日月壺爲是因緣生此地從來長養譬如無二學士從此不睦

玉壺冰張牧之隱於竹溪不喜與世接客來蔽竹窺之或韻人佳士則呼船載之或自刺舟與語俗子十反不一見怒罵相踵不顧也

魏野居陝州東郊手植竹樹清泉環遶旁對雲山景趣幽絕鑿土袤丈曰樂天洞前爲草堂彈琴其中好事者多載酒載從之遊嘯詠終日出則跨白驢

宋史袁彥傳彥河中河東人顯德中授內外坊軍都軍頭領泉州刺史未幾改岳州防禦使從征壽州爲城北造竹龍都部署竹龍者以竹數十萬竿圍而相屬上設版屋載甲士數百人以攻其城

錢氏世家昱好學多聚書喜吟詠多與中朝卿大夫唱酬嘗與沙門贊寧談竹事迭錄所記昱得百餘條因集爲竹譜三卷

五行志太平興國二年八月青城縣民家竹一本上分雙莖

五年五月眉山縣竹一莖十四節上分二枝長丈四尺十月龍水縣華嚴寺舊截竹爲筒引水忽生枝葉

長二丈許知州美宜以聞

六年七月新津縣趙豐村竹一莖十二節上分兩岐知州崔憲以聞

八年十月乙酉蜀州獻瑞竹一本十六節上分兩岐雍熙三年四月眉山縣獻異竹圖

端拱二年七月彭山縣民家生異竹

淳化二年二月射洪縣安國寺竹二莖同本六月舒州竹連理知州樂史以聞十一月陵州民趙崇家慈竹二莖長六尺許其二別有根根莖分十枝長丈餘又一本三莖並聳

三年十月朗州異竹生

太平興國四年十二月榮州獻異竹圖

至道元年十一月潭州監軍解生竹一本長二尺許枝葉萬餘尤爲殊異

二年六月虔州龍泉縣合龍院竹一竿分兩枝咸平元年十二月宣化縣保聖山瑞竹生一本二枝二年閏二月宣池欽杭越睦衢婺諸州箭竹生米如稻時民饑采之充食

景德四年十二月蓬州上瑞竹圖
大中祥符元年四月溫州獻瑞竹圖八月黃州獻異竹一本雙莖
三年四月京師竹有華占云歲不豐八月江陵縣民張仲家竹自根上分幹其一幹又分三莖九月江陵府永泰寺竹出地七節分爲兩莖長丈餘知府陳堯咨以聞
四年四月古田縣僧舍竹一本上分三莖瑞昌縣民李讓家筍竹一本去地五尺許分爲二莖知州范應

辰以聞八月知信州李放獻瑞竹圖三本

八年四月彰明縣民家竹一根上分二本十三節又開元寺桃竹一莖上分十八節皆相對

九年十一月武岡縣民何文化園竹生兩株同本上分四莖十一月晉原縣民李彥滔家竹一本雙莖對節知州王世昌圖以獻

天禧元年四月邵陽等縣竹生穗如米民饑食之又浮梁縣竹生穗如米七月漢陽軍太平興國寺異竹一本生二莖節皆相對

乾興元年六月興州竹有實如大麥民取以食占曰大饑

司馬池傳池知光山縣禁中營造詔諸州調竹本州符期三日畢輪池以土不產大竹轉市蘄黃非三日可致乃更與民自爲期約過不輸者罪之既而輸竹先諸縣盛度薦於朝改祕書省著作佐郎

寇準傳準在雷州踰年卒歸葬西京道出京南公安縣人皆設祭哭於路折竹植地挂紙錢逾月視之枯竹盡生笋衆因爲立廟歲時享之

李參傳參知荆門軍荆門歲以夏伐竹并稅薄輸荆南造船積日久多蠹惡不可用牙校破產不償參請冬伐竹度其費以給餘募商人與爲市遂除其害

花史桂東萬玉城世傳王會寓此階砌尚存旁有修竹數竿日夕自仆掃其地而復立

揮塵後錄富鄭公晚居西都嘗會客於第中邵康節與焉因食羊肉鄭公顧康節云羹羊惟堂中爲勝堯夫所未知也康節曰野人豈識堂食之味但林下蔬笋則常喫耳鄭公報然曰弼失言

洛陽名園記富鄭公園自其第東出探春亭登四景堂則一園之景勝可顧覽而得南渡通津橋上方流亭望紫筠堂而還右旋花木中有百餘步走蔭樾亭賞幽臺抵重波軒而止直北走土筠洞自此入大竹中凡謂之洞皆斬竹丈許引流穿之而徑其上橫爲洞一曰土筠縱爲洞三曰水筠曰石筠曰樹筠歷四洞之北有亭五錯列竹中曰叢玉曰披風曰漪嵐曰夾竹曰兼山

苗帥園北竹萬餘竿皆大滿二三園疎筠琅玕如玉

董氏西園有一堂竹環之中有石芙蓉水自其花間湧出開軒意四面甚敞盛夏煥暑不見長日清風忽來留而不去幽禽靜鳴各誇得意此山林之景而洛陽城中遂得之

却掃編西京一僧院後有竹林甚盛僧開軒對之極瀟灑士大夫多遊集其間一日文潞公亦訪焉大愛之僧因具勝乞命名公欣然許之攜勝以歸數月無耗僧往請則曰吾爲爾思一佳名未之得也姑少待後半年方送勝還題曰竹軒余觀士大夫立所在亭堂名當理而無疵者極少潞公之語雖質然不可破也

花史許州有修竹二十餘畝溪水貫其中文彥博爲置守

宋史五行志天聖元年五月興州竹有實如大麥民取以食之占曰竹有實大饑

禮志景祐三年禮官宗正條定逐室時薦以京都新物略依時訓協用典章請每歲春月薦蔬以笋果

以含桃

山堂肆考至和二年成都費孝先遊青城詣老人村壤其竹牀孝先欲償其直老人曰子不見牀下書云某年月日造某年月日爲費孝先壤

邵氏聞見後錄仁皇帝嘉祐七年十二月庚子幸天章閣召兩府以下觀瑞物十三種其一爲瑞竹一節有二絃並生其中

章子厚在丞相府顧坐客曰延安帥章質夫因板築發地得大竹根半已變石邊地自昔無竹亦一異也客皆無語先人獨曰天地回南作北有幾矣公以爲今日之延安爲自天地以來西邊乎子厚太息曰先生觀物之學也蓋子厚蚤出康節門下也

老學庵筆記王荆公於富貴聲色略不動心得耿天驚憲竹根冠愛味不已

李方叔西遊記司馬公獨樂園有竹一本去地二尺分爲二幹並生六節節間容線復合爲一洛中號爲瑞竹

宋史五行志元豐二年四月眉州生瑞竹四年十月鄭縣天慶觀生瑞竹一本自第九節分莖雙起

張戢傳戢知公安縣徙監司竹監至舉家不食笋常愛用一卒及將代自見其人盜笋擄治之無少貸罪已正待之復如初略不介意其德量如此

仲忻傳忻字天貺溫州永嘉人力學以篤行稱年五十餘執母喪盡孝禮躬自負土廬於墓側有慈烏白竹之瑞

郭義傳義興化軍人客錢塘聞母喪徒跣奔喪每一

懶輒嘔血聚土爲墳手時松竹而廬於其旁
獨樂園記治北橫屋六楹前後多植美竹命之曰種竹齋

蘇東坡集古氏南坡修竹數千竿大者皆七寸圍盛夏不見日蟬鳴鳥呼有山谷氣象竹林之西又有隙地數畝種桃李雜花今年秋冬當作三間一龜頭取雪堂規模東蔭修竹西眺江山若果成此遂爲一郡之嘉觀也

風篁嶺多竹風韻淒清至此林壑深沈迴出塵表流淙活活自龍井而下四時不絕嫩故叢薄荒密元豐中僧辨才淳治潔楚名曰風篁予訪辨才龍井送至嶺上左右驚曰遠公過虎溪矣辨才笑曰杜子有云與子成二老來往亦風流遂作亭嶺上名曰過溪亦曰二老作詩記之

嶺南人當有愧於竹食者竹筴底者竹瓦載者竹篾爨者竹薪衣者竹皮書者竹紙履者竹鞋直可謂一日不可無此君也耶

昔時與可墨竹見精練良紙輒奪筆揮灑不能自已坐客爭奪持去與可亦不甚惜後來見人設紙筆研即逡巡避去人就求索至終歲不可得或問其故與可曰吾乃者學道未至意有所不適而無所遣之故一發於墨竹是病也今吾病良已可若何然以予觀之與可之病亦未得爲已也獨容有不發乎予將伺其發而掩取之彼方以爲病而吾又利其病是吾亦病也

畫史與可每作竹貺人一朝士張潛迂疎作謹文作紆竹以贈之如是不一又作橫綱丈餘著色偃竹以

貺子瞻南昌過黃借得以做臨之後數年會余眞州求詩非自陳不能辨也余曰偃蹇宜如李揮毫已遍翁衛書無曲妙琰惠有遺工作觀虬如物初披風有風顧藏惟謹鑄化去或難窮

蘇軾予瞻作墨竹從地一直起至頂余問何不逐節分曰竹生時何嘗逐節生運思清拔出於文同與可自謂與文拈一瓣香以墨深爲面淡爲背自與可始也作成林竹甚精

冷齋夜話東坡嘗要劉器之同參玉版和尚器之每倦山行聞見玉版欣然從之至廉泉寺燒笋而食器之覺笋味勝問此笋何名東坡曰即玉版也此老師善說法要能令人得禪悅之味於是器之乃悟其戲爲大笑東坡亦悅作偈曰叢林眞百丈嗣法有橫枝不怕石頭路來參玉版師聊憑柏樹子與問籊龍兒瓦礫猶能說此君那不知

却掃編蘇黃門子由南遷既還居許下多杜門不通賓客有鄉人自蜀川來見之伺候於門彌旬不得通宅南有叢竹竹中爲小亭遇風日清美或徜徉亭中鄉人既不得見則謀之聞人閤人使待於亭旁如其言後旬日果出鄉人因趨進黃門見之大驚慰勞久之曰子姑待我於此翻然復入迨夜竟不復出

武夷山記峯山頗有佳竹多蚪屈如龍蛇狀華陽宮記循壽山而西移竹成林復開小徑至百數步竹有同本而異幹者不可紀極皆四方珍貢又雜以對青竹十居八九曰斑竹麗

齊東野語世傳涪翁喜苦笋嘗從賦老乞苦笋詩云南園苦笋味勝肉籊龍稱寔莫採錄煩君更致蒼玉

東明日風雨吹成竹又和坡翁春菜詩云公如端爲苦笋歸明日青衫誠可脫坡得詩戲語坐客云吾固不愛做官魯直遂欲以苦笋硬差致仕聞者絕倒嘗賦苦笋云苦而有味如忠諫之可悟國放翁又從而獎之云我見魏徵殊嫵媚約束兒童勿多取於是世以諫笋目之殊不知翁嘗自跋云余生長江南里人喜食苦笋試取而嘗之氣苦不堪於鼻味苦不可於口故嘗屏之未始爲客一設及來黔入冬掘苦笋萌於土中才一寸許味如蜜蔗初春則不食惟雙道人食苦笋四十餘日出土尺餘味猶甘苦相半以此觀之涪翁所食乃取其甘非貴乎苦也南康簡寂觀有甜苦笋周益公詩云蔬食山間茶亦甘况逢苦笋十分甜君看齒頰留餘味端爲森森正且嚴此亦取其甜耳世人慕名忘味甘心茶苦者果何謂哉又記涪翁在戎州日過蔡次律家小軒外植餘甘子乞名於翁因名之曰味諫軒其後王宣子予以橄欖送翁翁賦云方懷味諫軒中果忽見金盤橄欖來想其餘甘有瓜葛苦中眞味晚方同然則二物亦可名之爲諫果也

過庭錄邵伯恭侍郎守長安既去久之以書抵親識曰自去長安唯酥梨笋時復在念其他漫然不復記噫可謂風流矣

宋史五行志元符二年正月處州民田生瑞竹崇寧四年七月瀘州瑞竹生

政和四年八月建州境內竹生米數千萬石三年十一月癸酉越州承天寺瑞竹一竿七枝幹相似其葉圓細生花結實詔送祕書省仍拜表賀

艮嶽記景龍江北岸萬竹蒼翠鬱仰不見天有勝雲庵躡雲臺消閒館飛岑亭無雜花異木四面皆竹也

圖繪寶鑑宋徽宗作墨竹緊細不分濃淡一色焦墨叢處微露白道自成一家不蹈襲古人

端獻王頴越國夫人吳氏以淡墨寫竹整整斜斜曲盡其態見者疑其影落綠素

程堂字公明眉人善畫墨竹宗文湖州好畫鳳尾竹其梢極重作回旋之勢而枝葉不失向背

李誕河間人多畫叢竹筍籜鞭節色色畢具此宜和體也

書史朝議大夫王之才妻南昌縣君李尚書君擇之妹能臨松竹木石書

夢溪筆談近歲延州永寧關大河岸崩入地數十尺土下得竹筍一林凡百莖根幹相連悉化為石適有

中人過亦取數莖去云欲進呈延郡素無竹此入在數十尺土下不知其何代物無乃曠古以前地卑氣

濕而宜竹耶婺州金華山有松石又如桃核蘆根蛇蟹之類皆有成石者皆其地本有之物不足深怪此

深地中所無又非本土所有之物特可異耳

補筆談嶺南深山中有大竹有水甚清徹溪澗中水皆有毒惟此水無毒土人陸行多飲之至深冬則凝

結如玉乃天竹黃也王彥祖知雷州日盛夏之官山溪間水皆不可飲唯剖竹取水烹飪飲啜皆用竹水

次年被召赴闕冬行求竹水不復可得問土人乃知至冬則凝結不復成水遇夜野火燒林木為煨爐而竹黃不灰如火燒獸骨而輕土人多於火後採拾以

供藥品不若生得為善

宋史王珠傳珠字仲淵吉州龍泉人以孝謹聞建炎

間居父憂芝數本生墓側倒植竹以為杙復生柯葉紹興間再罹母喪復有靈芝雙竹之祥

揮塵餘話紹興中趙元鎮為左相一日入朝見自外移竹栽入內奏事畢亟往視之方興工於隙地元鎮

詢誰主其事曰內侍黃彥節也元鎮即呼彥節詰責之曰頃歲艮嶽花石之擾皆出汝曹今將復蹈前轍

邪命勒軍令狀日下罷役彥節以聞於上翌日元鎮奏事上諭曰前日偶見禁中有空地因令植竹數十

竿非欲以為苑囿然卿能防微杜漸如此可謂盡忠爾後儻有似此等事勿憚以警朕之不逮也

福建志紹興十八年候官縣有竹實如米饑民採食之

五行志乾道元年七月池州竹生穗實如米饑民採之以食守臣魯魯為野穀生竹圖以獻御史劾魯不

以民食草木為病坐佐免官

老學庵筆記筍竹杖蜀中無之乃出微外蠻洞蠻人持至瀘叙間賣之一枝纔四五錢以堅潤細瘦九節

而直者為上品

續筆記海南儋崖諸郡出勒竹枝大於幹澀竹膚有芒可以到瓜東坡詩云倦看澀勒暗蠶烟是也

研北雜志朱希真常言山陰富水竹有洛陽許下氣象圖繪寶鑑莊靖王適裕孝宗之弟也工墨竹喜作挂屏長竿枝梢旁出如簷底乍見濃墨獵獵頗具掀舞之態

艾淑字景孟建寧人號竹軒善畫竹時又有茅汝元號靜齋善墨梅人以艾竹茅梅為稱

陳虞之字雲翁號止所作墨竹每見竹折小枝就日影視之皆欲精到

崖下放言山中有竹數千竿皆余累歲手植初但得數十竿耳一旦觀之既久不覺成林無一處不森茂

可喜嘗自戲善種竹無如余者頃過吳江以語王份秀才份云竹殊易種但得肥地盡去瓦礫荆棘深根

賴以水沃取糞壤使壅培無不可活不必擇時然取美觀則可如欲為用不如瘦瘠地礮碎非人力所營

或崖谷間自生者其實堅實而肉厚斷之如金石以為椽常竹十歲一易者此倍之吾居前後多竹椽既

歸一一驗之無不如其言乃知今三十年種竹初未嘗得真竹微份余不開君子哉若人

茅亭客話滕處士昌祐園中有慈竹叢生根不離母故名之慈也有釣絲竹以其弱杪低而垂至地也有

絲竹葉細而青莖瘦而紫亦謂之墨竹有對青竹身黃色有一脈青節節相對故謂之對青也有苦竹葉

穠多陰筍高之時粉香籜翠有柱竹扶疎葉茂瀟灑亭臺無出此數君也俗以五月十三日種竹多遭烈

日曬乾園中竹以八月社前後是月天邑多陰土潤竹以此月行根也凡欲移竹先掘地坑令寬大以水

調細土作稀泥即掘竹四面鑿斷大根科連根以繩裹定昇時勿令動著根鬚間土昇入坑致泥漿中令

泥漿周匝徧滿乃東西搖之復南北搖之令泥漿入至鬚間便以細土覆之勿令土壅過竹本根也若竹稍長者芟去顯葉纏竹架之恐風搖動即死每巢相

離去二尺餘不須實斯只以一脚蹈之來年生筍速也宜於園東北軟土上種之竹性多西南行根不用頻澆水水多則肥死

貴耳集淳熙間省元徐履因功名之念太重遂有心恙之疾殿試用卷子寫一枝竹題曰畫竹一竿送上試官朝廷亦優容之以省元身後一官與其子子亦恙官遂絕

養荷漫筆竹之異品頗多成都古今記云對青竹黃而溝青故每節若間出云此竹今浙中亦有之惟會稽頗多彼人呼為黃金間碧玉辰州有一種小竹曰龍絲竹生山谷間高不盈尺細僅如針前輩詩有小竹如針能具體即此也武陵桃源山有方竹四面平整如削堅勁可以為杖予頃在湖湘間見有以竹為桶者其徑幾二尺羅浮山記云第三峰有竹大徑七尺圍節長丈二葉若芭蕉謂之龍公竹松憲雜錄有異竹篾長二百餘尺玉篇云箬竹可為舟但未親見耳云實有之

冷齋夜話西湖僧清順怡然清苦多佳句嘗賦十竹詩云城中寸土如寸金幽軒種竹只十箇春風慎勿長兒孫穿我階前綠苔破

鄒志完南遷自號道鄉居士在昭州江上為居室近崇寧寺因閱華嚴經於觀音像前有修竹三根生像之後志完揭茅出之不可乃垂枝覆像有如今世畫寶陀山巖竹今猶在昭人局鎖之以俟過客遊觀玉澗雜書吾山有竹數萬本初多手自移今所在森然成林有筍竹斤竹哺雞竹斑竹紫竹數十種略備而筍笋最可食今歲自春不雨累月笋類不出顧頗

念之四月初一日雨踰旬忽裂地迸出如拔亟取供庖而園人斬之甚請留以俟再出問其故曰笋惟初出者盡成竹次出者多為蟲所傷十不得五六乃悟老杜詩瓜須辰日種竹要上番成之意遂忻然許之王子猷聞人有竹徑造不問主人雖為脫略無所繫然有時而還則娛悅亦無幾李衛公童子寺竹日使人報平安不惟不得見將不免累其胃中正使無恙亦何所補此竹吾所已有但自守之日往來其間所得過二子遠也

過庭錄蔡持正少於泗州道中山寺讀書僧厭其久書舍有竹書一絕壁間云意前翠竹兩三竿瀟灑風吹滿院寒常在眼前君莫厭化成龍去見應難已有宰相氣味蔡作相其詩尚存先子經過常見之避暑錄話山林園圃但多種竹不問其他景物望之自使人意滿然竹之類多尤可喜者筍竹益色深而葉密吾始得此山即散植竹略有三四十竿雜衆色有之意數年後所向皆竹矣戊申己酉間二浙竹皆結花而死俗謂之竹米於是吾所植亦槁盡今所存惟介竹數百竿耳方其初花時老圃輒能識之告我亟盡伐去存其根則來歲尚可復生而余終不忍至已槁而後伐則與其根俱朽矣比雖復補種而竹種已難得不能及前五之一然猶更須三五年始可望其干雲蔽日今日有告余種竹法者但取大竹善掘其鞭無使殘折從根斷取其三節就竹林燒其斷處使無泄氣種之一年即發細笋掘去勿存次年出笋便可及母此良有理插柳者燒其上一頭則抽條倍長鬻牡丹者燒其柄或蠟封即不蔞蓋一術也當即

試之然種竹須當五六月雖烈日無害小瘁久之復蘇世言五月十三日為竹醉可移不必此日凡夏皆可種也杜子美詩云西窗竹影薄臘月更須栽余舊用其言每以臘月種無一竿活者此亦余信書之弊而見事遲也

山家清供春訪趙湖壁弟竹潭雅亦在焉論詩把酒及夜無可供者湖曰吾有鏡湖之蕪潭曰雍有稽山之笋僕笑可有一栢羹矣乃命庖作玉帶羹以笋似玉蕪似帶也是夜甚適今猶喜其清高而愛客也每讀忠簡公躍馬食肉付公等浮家汎宅真吾徒之句有此兒孫宜矣吳興園林記章氏水竹塢章農卿北山別業也有水竹之勝

欽定古今圖書集成博物彙編草木典

第一百九十六卷目錄

竹部紀事二

竹部雜錄

竹部外編

草木典第一百九十六卷

竹部紀事二

金史世宗本紀大定九年五月戊辰尚書省奏越王永中隋王永功二府有所興造發役夫上曰朕見宮中竹有枯瘁者欲令更植恐勞人而止二王府各有引從人力又奴婢甚多何得更役百姓

五行志衛紹王至寧元年宣宗彰德故園竹開白花如鸞鷟藤紫雲覆城上數日俄而入繼大統

元史食貨志竹之所產雖不一而腹裏之河南懷孟陝西之京兆鳳翔皆有在官竹園國初皆立司竹監掌之每歲令稅課所官以時採所定其價爲三等易於民間至元四年始命制國用使司印造懷孟等路司竹監竹引一萬道每道取工墨一錢凡發賣皆給引至二十二年罷司竹監聽民自賣輸稅明年又用郭賁言於衛州復立竹課提舉司凡輝懷嵩洛荆襄益都宿开等處竹貨皆隸焉在官者辦課在民者輸稅二十三年又命陝西竹課提領司差官於輝懷辦課二十九年丞相完澤言懷孟竹課頻年斫伐已損

課無所出科民以輸宜罷其課長養數年世祖從之此竹課之興革可攷者也
西吳枝乘管道昇畫傳者絕少在吳興者錯龍殿畫竹耳

文湖州竹生平僅見真跡一帖在橫間上乃折竹也其題者二人柯九思題云湖州放筆奪造化此事世人那得知是然何處見生氣彷彿空庭月落時金粟道人何瑛題云湖州昔在湖州日日日逢人寫竹枝一投枯梢作三折分明雪後上聽時

芸憲私志凝波竹實服之肌滑體輕出區吳山紫枝綠葉堅滑如玉風吹有聲如環珮成帝種於臨池觀更名曰環珮竹花如海榴實如蓮子而小近謝芬蘭庭中忽生此竹人以爲瑞而不知爲何物其後讀海外志始知之第無花實明年出筍如常竹前種亦漸不然人以爲積善所致

輟耕錄白廷玉先生挺號湛淵錢塘人家多竹忽一竿上岐爲二人皆異之賦雙竹杖詩未幾先生歿先生有二子或以爲先兆云

雲林遺事元鎮常自題其畫竹云以中每愛予畫竹余之竹聊以寫胸中逸氣耳豈復較其似與非葉之繁與疎枝之斜與直哉或塗抹久之他人視以爲麻爲蘆僕亦不能強辨爲竹真沒奈覽者何但不知以中視爲何物耳

該聞集舊稱竹實爲鸞鳳所食今近道竹間時見花開如棗結實如麥江淮間號爲竹米以爲荒年之兆其竹即死信非鸞鳳之食也近有餘千人來言彼有竹實大如雞子竹葉層層包裹味甘如蜜食之令人

心肺清涼生滿竹林茂密處項因得之雖日久乾枯而味尚存乃知鸞鳳所食必非常物也

妮古錄高皇帝燕處武樓中詹同在左右偶理竹事帝曰竹之類其亦多乎同對曰其實皆戴凱之譜五十餘種或根如盤輪或節若束針或細則勝箭或鉅可爲舟有未能盡舉者大槩其色皆青其體皆圓也惟吳越山中有名方竹者最爲僂異四稜直上弗圓弗頗若有廉隅不可犯之色故士大夫愛之往往采而爲筴既退獲一枝以獻帝摩挲觀之親御翰墨草方竹記一通

珍珠船友人張棠宗以片紙錄奇竹事云同邑安福西鄉地名下莊有周俊叔得十二時竹一根繞節所生子凡十二時點畫可數

書蕉武林山西舊有雙竹院中所產修篁嫩篠皆對抽並引王子敬竹譜所謂扶竹簪猶海上之桑兩兩相比謂之扶桑也

羅浮山第三十一嶺半是巨竹皆七八圍長一二丈閩部疏延福以南有竹叢生涉冬抽萌慈竹類也而長刺雲大者拱把吳越慈竹迥出其下

粉竹春絲爲佳紙料者美於江東白竿

居山雜志美竹高者至數丈其名曰毛竹並山左右皆有之三伏陰其下無暑氣然獨宜山岡則生移之平陸則弗活其餘竹數甚多無踰此品游人多愛刻名其上題蹟可經數年不壞久之益若蟲書古篆可觀

月河梵苑記聚景亭東隙地植竹數挺曰竹塢遊台宕路程玉京洞天前蔭美竹從竹間見晚烟野

色甚媚

玉堂漫筆衡山後生竹最大名曰南竹土人截取其筒以爲甌節處可製盥盆然在深山中人跡不到之處

越遊雜記太平庵看竹俱大如汲桶而毛葉離離不啻雲鳳之尾

燕都游覽志駙馬都尉萬公白石莊在白石橋北臺榭數重古木合抱竹色葱蒨盛夏不知有暑附郭園亭爲第一

西吳枝乘近世有婦人曹希蘊者頗能詩雖格韻不高然時有巧語嘗作墨竹詩云記得小軒岑寂夜月移疎影上東牆此語甚工

鎮江府志金山金玉懸巖一名竹徑在山東南江天閣下山有竹色黃節綠名黃金嵌碧玉又有竹色綠節黃名碧玉嵌黃金

福建志古田縣有馬山多竹可爲楮
武彝山白雲巖下爲寒巖右爲毛竹洞唐李商隱詩武彝洞裏生毛竹老盡曾孫更不來

福清縣石竺山其產少竹而多筍春夏之交鄉人於此采筍欲多則不可得號濟筍筍

南安縣苦竹山有隱君寓石牀石曰存焉隱君好竹至今竹數里瀾漫山中鄉人取筍號曰英竹
興化府志城東南穀城山舊有梅隱松隱竹隱三精舍

四川志筍篋山在大渡河西北五十餘里曰前篋又行數十里曰後篋山多筍故名惟蘇者以爲衣食之源

廣東志清遠縣五十里曰峽山相傳黃帝二庶子南採阮俞竹爲黃鐘之管與二臣俱隱此山祠在廣慶寺東廡今山上小竹節間長九寸圓徑三分疑此山即阮俞舊志誤爲崑崙耳

東安縣之東南五里曰雲浮嶺上產異竹
貴州志聖婆不知何許人領五男行至鎮遠印水司岑樓山以竹植地祝云我得地竹當成林果成林時揮涕竹上今霧雨竹有淚如涕

深陽縣志明洪武初嘉竹瑞麥生
松江府志正統戊午春富林焦震家生瑞竹凡二本皆異梢同幹森然齊長壬戌生一本亦如之震隱居教授與弟雨友愛深至人以其和氣所鍾云

江津縣志瑞竹亭在櫺星門內舊無竹景泰三年忽生笋一本二岐節節相對知縣顧亭作亭名曰瑞竹上高縣志成化二年丙戌刺竹實遂枯

蘭溪縣志成化十五年純孝鄉壽昌界上竹生實如麥民採食之
昌化縣志成化十七年夏五月箭竹生花明年結實如麥

延平府志吳仁澤者恭之父也葬雲蓋里俞坑之陽近墓舊無竹永樂十六年墓之左忽一笋迸出是歲恭領鄉薦登進士至成化元年復一笋出於故處其秋曾孫珙中鄉試八年又出一笋是春珙亦登進士

第十九年又出一笋珙由龍泉尹陞戶部主事笋出惟一竿挺然獨秀不復別出也里人皆以爲異因呼爲瑞竹

武義縣志成化乙巳歲大荒山鄉小民多食賦祿盡

爲瑞竹

巧食於鄉忽見竹林中枝頭出穗形如米如麥而色赤民採食之賴以活自後不復得
新昌縣志成化開張種存蟠縛黃楊折竹一枝插土未幾生笋數莖人謂瑞竹
徐州志弘治元年竹開花

青浦縣志弘治開玉屏山顧廷儀家生瑞竹一根兩

平涼府志正德三年府西南山竹結實有貓食之毛如貉可爲裘人亦可食是冬竹盡枯數年乃復生
高安縣志正德三年春民饑桃竹生子春之可以炊食

宜春縣志正德四年竹生花結米民採食之
正德八年刺竹有花結子其年田禾不收刺竹花結子可食

正德十年刺竹又花而實仍可食
靖江縣志嘉靖五年通邑竹節生花大如豆形如人而色亦青

青陽縣志嘉靖六年邑內九華山叢竹結實延十餘里小者如米大者如麥中赤外青甘食如飴民賴以不饑

漳浦縣志嘉靖九年饑山竹生實如米採之數百石饑民賴以供食
宜章縣志嘉靖戊戌平和粟山竹林廣七八里竹梢生米如稷

昌化縣志嘉靖二十年馬嶺山箭竹開花結實採之而春得黑色碎米食之瀉痢

富川縣志嘉靖二十三年竹結實如米其年饑民採

而食之

二十四年竹又結實

鶴慶府志小西湖廣袤約十里許有竹脩脩然參差於老樹間在水最深處飄搖如荇藻冬春閒開放梅花一兩枝似可以手採取及以舟篙觸之深不可及修撰楊升庵同侍郎李中溪載繩一舟以鐵鉤繫繩頭鉤取枝葉繩沒盡竟不能至竹樹所收繩量之足六十丈歎為奇觀題澄潭竹樹四大字及詩兩絕而返

石埭縣志嘉靖二十五年八九都歷山竹生實可萬石民皆為食

武平縣志嘉靖三十二年癸丑黃竹華其實如米可食時以為兵兆

藍田縣志嘉靖三十四年大稔秦嶺山一帶竹開花結子人取以充饑

餘杭縣志嘉靖三十八年餘杭竹生米甚多民間煮食之如大麥人云是歲凶之兆

鍾祥縣志嘉靖三十八年竹盡花

長汀縣志嘉靖三十九年黃竹華其實如米居民取食之

合浦縣志嘉靖四十一年刺竹悉華實如麥隨枯死自壬戌至丙寅無遺竿他竹皆無恙

臨湘縣志嘉靖四十二年竹盡開花次年枯死

浦江縣志萬曆壬申洪氏海塘有砍斷枯竹三年復節開抽笋放梢四五尺山陰張天復記其事又祝氏祖塋孤竹三四節已上再分兩歧而放梢亦復生於倪氏園

推壬申乃隆慶六年神宗未改元也縣志稱萬曆誤

重慶府志萬曆三年榮昌瑞竹生

沙縣志萬曆丙戌四郊竹開花四瓣下垂如燈籠黃苞中紅是處有之

永昌縣志永平民有受直為人傭作者以他役逾期不起主人怒而逐之哀求不納哭而去曰去則母無以食奈何行未幾倦臥道傍夢一人撫其背曰無傷也某山之原有竹試往攀而搖之可得米以養覺而憶其山舊遊也往之竹下果得米於時萬曆庚寅辛卯間也滇中一時所在皆有之晉寧楊全太守時為司徒郎出差歸里及入京攜以餽人其米非稻非麥長三倍稻米作粥不稠濁為飲潤而甘微帶香味

永昌府志萬曆二十一年騰越竹多實

臨安縣志萬曆二十二年觀音寺生瑞竹

浪穹縣志萬曆二十四年歲饑民多乏食縣西山後及鳳羽山後一帶林竹皆生竹米可炊而食其味香美饑民採之振林則墜下如雨事上聞上司皆取用以為奇自後絕無山竹由此亦枯矣

諸暨縣志萬曆二十六年歲大歉饑饉相望箭竹內每節產米一粒傳為箭米人采之療饑

如皋縣志萬曆二十七年新泰令李上林池畔插竹扈魚忽生枝葉人以為異移栽砌下久遂成林

如皋縣志萬曆二十九年東鄉產金笋一株長五六寸夜時有光鄉人怪之入市以示銀工遂為工人易去

李豐縣志萬曆二十九年竹實民採以為食

昌化縣志萬曆三十五年箭竹生花結實

婺源縣志萬曆丁未春瑞竹生於玉川後龍山一本

自十節以上分為兩歧節節相偶直上枝葉蓊盛

陽江縣志萬曆三十有六年戊申刺竹開花結實遂盡枯竹實狀如小麥民爭采食而枯枝乾葉微風一起如哀角悲笳不堪聽聞或云兆饑兆兵然來年大疫亦不祥之徵也

邛州志萬曆三十七年異竹產於臨邛縣治東北半里楊氏園中一本二幹並挺扶疎高幾二十丈

德慶州志萬曆三十八年竹生花

徐州志萬曆三十九年桃山岳武穆王祠竹開花

太平縣志黃山自浮丘源抵洋湖三十里皆生小竹幹粗如筍其葉頗大山僧作靜室取以蓋屋可代瓦崇禎辛巳歲饑竹皆產實離離似稷饑民爭往持之賴以全活者甚衆傳致遠方疫者得少許煎湯飲之即愈自此竹盡死十年來復森茂如故

廬陵縣志真常觀今改為金竹庵崇禎時生簞竹其幹節有黃文相間而垂竹譜謂之黃金間碧玉故名

涑水縣志竹子纏在傳房山之西其地多叢竹故名

淄川縣志龍口竹園西園流泉灌中曲折北出門前置小橋園中修竹萬个綠陰合圍東園竹亦森列泉低不可引溉

高氏竹園中舊一草亭今圯亭南一池池上石橋亭北雜蔬數畦餘三面皆竹竹頗盛

志壑堂前鑿池種芙蓉池邊修竹千竿徑可四五寸綠蔭蕭森江以北所未有也

嶧縣志燎竹峪在滄浪淵西北一里許嶺藏大巖中其竹盡如火燎故名

濟寧州志竹園北地艱水此地城潦所集宜竹故名

第五四七冊 之〇七葉

博物彙編草木典第一百九十六卷竹部

古入圖書集成

洪園相里鋪北植竹滿園

蓬萊縣志小竹島大竹島產竹故名

招遠縣志六公澗相傳神仙唐公郎公化公志公張公夢公修真處洞之土者凡六區石礮石曰各一又有芍藥毛竹皆不植自生亦奇跡也

萊州府志兩髻山在平度州東北十三里地產竹高二三尺叢伏如豹

雲山在平度州東北五十里產竹成林蒼翠可愛

通許縣志北郊太學生楊茂春直諒樂善園居修竹一叢新篁方出偶園丁傷其一竿主人惜之意殊不樂忽一羽士至前詰所以不樂之故主人告之羽士曰無傷也余能為公活之因舉手若撫摩狀約以次早方可驗視飄然而去主人如其言詰朝則篁已挺立如未始傷者其折處微腫類木癭狀始知昨所至者乃仙人也縉紳題軒曰來仙亭

汜水縣志竹川古三窟村也去城南二十里汜水經其東近西高岸丈餘岸上有泉曰太溪一泓澄靜不見水出而下自潺湲滿川綠竹賴以為潤萬竿亭立潏波綠陰暑月浸浸生涼

洛陽縣志明太守沈公於郡城西南里許毀佛寺為亭植竹數竿於內匾曰清風亭

會隱園唐曰樂天園也樂天云吾有第在履道坊五畝之宅十畝之園有水一池有竹千竿是也今張氏得其半為會隱園水竹尚甲洛陽園中樂天石刻存者尚多

未寧縣志金門山一名律管山其山產竹可為律管黃帝時伶倫取之以造律呂

盧氏縣志箭幹嶺在縣西一百六十里上產竹可為箭幹

盤屋縣志司竹監周穆王遊元池植之竹竹皆成斑其大如椽其密如簣秦益繁盛設官守之漢謂之渭川千畝竹亦名芒竹以芒水之渠而多竹林也居攝二年三輔豪傑霍鴻起兵討王莽據芒竹魏置司竹都尉秩六品又有司竹監丞秩八品晉地道記司竹都尉尉健兵至長安杜洪奔司竹死及稱帝豪傑胡陽亦起兵司竹隋廢都尉制司竹監丞掌之高祖起兵第三女平陽公主舉兵司竹圍號娘子軍武德二年何潘仁為左屯衛將軍駐司竹宋元皆有監明置司竹局大使典之後竹漸耗正統間募民種藝屬秦藩後廢

渭源縣志五竹山即青省山之支與露骨山相連有五色細竹叢生盛夏積雪不消

延安府志葭州西三十里有竹箭塢以地產竹箭也洋縣志質管谷縣北十里土門內是也產佳竹文與可甚賞作披錦亭於谷中夫婦嘗偕遊今亭廢竹亦蕩然

江寧府志慈姥山在城西南一百一十里二百步周二里高三十丈積石臨江岸壁峻絕山產竹可為簫管故俗亦呼為鼓吹山

深陽縣志史氏竹墅在上水關外題曰水竹平分蓋園中水一層竹一層相間以成也

太湖縣志法華邑西古剎也瓊刹生竹竹皆方削成如矩迥異翠竹過客題刻畫於青琅玕久之有類蝌蚪或斷節如老人杖輕瑩可愛今失其種

太平府志青山李白墓上產蘆如筆有竹散點如星無為州志竹子山去城西五十里多產竹

海州志竹島在海中去東海城八十里上多小竹如阜縣志萬竹軒許則柴灣別業為水竹最勝處則嘗臨流置軒環以琅玕萬箇名流多賦咏之

瑞竹樓李新泰上林園居枯竹成枝故名

常熟縣志竹林二其一在廣安寺簡大師插竹成林其一在乾元宮申元道插竹成林並見神通

杭州府志錢塘瑞慶院內有雙竹矯立斜透枯樹冠其頂森然並竦

仁和縣志曲竹塢在臨平山西唐丘丹隱此後化去棄杖於塢中生竹皆曲可為杖

海寧縣志參政祝萃墓在妙果山每產竹斜文曰龍竹

嵎縣志毛竹洞在金庭山洞口有竹生毛節覆一節故名

瑞昌縣志墨竹在亭子山東坡赴黃州過此題壁墨瀟灑竹間至今山竹點點墨痕人爭異之

未新縣志眠竹在縣北二都相傳宋隱士會庭堅遇方外人話元於此地久之各倦思臥遂覆篠竹寢其上既覺其人已去竹眠生至今云

新喻縣志白竹岡縣西三十五里山平而小所生唯小白竹

襄陽府志穀城縣蘆山在縣西南八十里山上有孤竹三莖三年生一笋笋就竹死代謝不已

臨湘縣志金竹山在縣東三十里上有小竹枝幹純黃遇冬愈鮮潤類黃金色相傳神人所植

黔陽縣志赤竹山在城東一百四十里岡隴盤紆赤竹叢生

金龍山有竹數竿偃如掃土

祁陽縣志苦竹山在縣東百里山多苦竹

竹嶺在縣東六十里山產篠竹峻壁四周蒼翠無間

重慶府志黔江縣斑竹山上有仙池池邊每歲生斑竹二株及尾則環連焉

長壽縣志相思崖在黃草峽上崖產相思竹竹連理若桃釵之形今絕種矣

沙縣志善硯園斑竹溪有竹可爲燭燃畢亦無灰相傳昔有一人夜借宿其家辭之曰吾小村無燈可照今晚不敢納也借宿者曰何患無燭前嶺上竹皆燭也教取以燃遂傳至今

甌寧縣志郭巖多修竹出仙笋味甘脆

葛仙山山色青潤多修竹笋味甘脆

龍門縣志賭婦潭在夢溪水口潭深數丈離長里許故老傳有牧童村女戲賭各持竹一邊從上流擲下云竹能相合夫婦相配至下流觀之竹果相合如生遂成夫婦故名賭婦潭

翁源縣志紙山在縣東南八十里產竹可造紙

平遠縣志梅子畚有竹數叢葉上有紅點如血相傳文信國天祥過此摘竹葉嚼血點封至今血痕猶存

四會縣志貞山在縣西南十里絕頂有三池傍有巨石如壇有竹下垂風至輒自掃壇石

貴縣志縣之西山出方竹傳有番人過此以數百金易竹八節作酒杯杯中隱隱有仙籟焉今已無種

楚雄府志定邊縣西北三十里大山頂有石佛二竹

生四圍每葉落即隨風掃去

竹部雜錄

詩經秦風小戎竹閉緹滕

莊子鴻鵠非練實而不食注練實竹實取其潔白也

家語南山之竹不搏自直斬而爲箭射蓬犀草

戰國策薊丘之植植於汶篁注竹田曰篁索隱云言薊丘之植植齊王汶上之竹田

呂氏春秋和之美者越輅之篴注竹筍也

淮南子竹以水生

漢水重安而宜竹

丘陵阪險不生五穀者以植竹木

史記貨殖傳渭川千畝竹此其人與千戶侯等

竹竿萬个

龜策傳竹外有節理中直空虛

河渠書褒斜材木竹箭之饒擬於巴蜀

風俗通殺青書可繕寫謹按劉向別錄曰殺青者直用青竹簡書耳

說文竹冬生草也筍竹胎也

晉書律歷志候氣之法靈臺用竹律楊泉記云取弘

農宜陽縣金門山竹爲管河內葭草爲灰或云以律著室中隨十二辰埋之上與地平以竹葦灰實律中以羅穀覆律呂氣至吹灰動穀

微祥記王者德至於天和氣感而甘露降尊賢容衆不失細微則竹葦受之

道書竹筍者日華之胎一名大明

水經注詩云瞻彼淇澳葉竹猗猗毛云葉王芻也竹編竹也漢武帝塞決河斬淇園之竹木以爲用寇恂爲河內伐竹淇川治矢百餘萬以給軍資今通望淇

川無復此物惟王芻編草不異毛注

續博物志河圖曰少室山大竹堪爲甑器山海經舜

林中大竹一節可以爲船漢竹大者一節受一斛小

者數升爲昇植廣志曰雲母竹大竹也離竹細而多

刺也篴竹堪作笛簫竹宜爲屋椽篴竹皮青肉白如

雪軟韌可爲索

夢書竹爲處士夢者當歸隱也

埤雅筍从刀从日包之日爲筍解之日爲竹

東坡志林竹有雌雄雌者多筍故種竹當種雌自根

生上至生梢二節發者爲雌物無逃於陰陽可不信

哉

蘇東坡集昔人以海苔爲紙今無復有今人以竹爲

紙亦古所無有也

岳陽風土記五月十三日謂之龍生日可種竹齊民

要術所謂竹醉日也

夢溪筆談淮南孔曼隱居篤行終身不仕美節甚高

嘗有竊其園中竹曼怒其涉水水寒爲架一小橋渡之推此則其愛人可知然予聞之莊子妻死鼓盆而